

Sustegn finanziel per las famiglias

Votaziun dals 8 da mars 2015

DA LUCAS DEPLAZES / ANR

■ **Il venderdi passà han exponents da la Partida cristiandemocratica da la Svizra (pcd) prendì posiziun a Berna davart lur iniziativa che vegn en votaziun dal pievel ils 8 da mars proxim. La pcd vegn sustegnida da la Partida evangelica da la Svizra (pev), da la Partida populara da la Svizra (pps) e da Pro Familia.** Sco quai che ha punctuà il president da la pcd, *Christophe Darbellay*, a la conferenza da medias a Berna vul l'iniziativa rinforzar las famiglias, tut las famiglias. Quai saja bain bel d'avair uffants, ha constatà Darbellay. Uffants custan dentant, uffants custan bler. Uffants èn ina considerabla chargia finanziala per ils geniturs. Experts han calculà ils custs per l'emprim uffant sin 819 francs per mais. Vitiers vegnan anc ils custs indirects. Darbellay ha er criticatgà la posiziun da la pss che haja pretendì pliras giadas ina distgargia da las famiglias cun uffants ed ussa ch'ina buna sliaziun è relisabla fa la partida opposi-

ziun. Ils opponents fetschian insumma ina guerra da cifras, ha deplorà il president.

■ **Ils supplements n'èn betg per il stadi**

Pirmin Bischof, cusseglier dals chantuns da Soloturn, ha fatg attent ch'ils patruns, pia nossa economia, pajan mintg'onn 5,5 milliardas francs supplements per uffants. Quai saja la cumpensaziun per ils gronds custs che van a quint dals geniturs per tgirar, per educar e per scolar lur uffants. Mo ussa prenda il stadi davent ina milliarda francs. Quests daners n'èn betg previs per il stadi, quels daners tutgan a las famiglias, ha constatà Bischof. Cun l'iniziativa da la pcd vegnan tuttas famiglias cun uffants distgargiadas sin ina moda u l'autra, independentamain da lur model da viver.

■ **Empermischun dal cussegl federal**

Barbara Schmid-Federer, cussegliera nazionala turitgaisa, ha regardà a l'empermischun da l'anteriur cusseglier federal Merz, che haja empermess da resguardar

uss las famiglias, sunter ch'il suveran ha acceptà ina distgargia da milliardas per las interpresas. Var in milliun da las famiglias cun uffants – dad 1,15 milliuns chasadas cun uffants – po profitar directamain da l'iniziativa. Quai saja fallà da pretender che mo ils ritgs possian profitar. Ina famiglia cun entradas, suttamesas a la taglia, da 50 000 francs spargna var 1000 francs l'onn. Sulettamain 6,3% dals uffants vivan en famiglias cun entradas autas. 59% dals uffants vivan en famiglias da la classa mesauna. Gist quellas famiglias crodan adina en emblidanza.

■ **Sustegn da la Partida evangelica**

Per l'Argoviana *Lilian Studer*, deputada da la Partida evangelica da la Svizra (pev), è la Svizra anc adina sin via al svilup areguard il sustegn per las famiglias. La Svizra mettia trais giadas damain meds finanzials a disposiziun da las famiglias che per exempel ils pajais scandinav. La pev che ha er gidà a rimnar suttascripziuns per l'iniziativa sustegna quella tar la votaziun dals 8 da mars 2015.